



Nivi Rosing, Inuit Ataqtigiiit
Medlem af Inatsisartut
inatsisartut@ina.alla.gl

**Nioqqutissanik ulluinnarni pisariaqartinneqartunik pilersuineq pillugu § 37
naapertorlugu apeqquteqaammut 2025-086-imut akissut**

Dato: 30-07-2025
Sagsnr.: 2025 - 14139
ID. nr.: 98743329

Asasara Nivi

Inatsisartut suleriaasianni § 37 naapertorlugu nioqqutissanik ulluinnarni pisariaqartinneqartunik pilersuineq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik..

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

**Apeqqut 1: Naalakkersuisut Air Greenlandip RAL-illu nioqqutissanik
assartuiniarneranni sunik piumasaqaateqartarpat?**

Akissut: Royal Arctic Line Namminersorlutik Oqartussanut akuersissuteqarnermut isumaqatigiisummik malitassaqqarpoq. Isumaqatigiisummi allassimavoq, *"Royal Arctic Line pisussaavoq, suliaminik isumannaatsumik piareersaassalluni ingerlatsissallunilu, taamaalillunilu ajornartoornerit sillimaffigalugit Kalaallit Nunaanni pilersorneqarnissamik pisariaqartitsineq naammassisinnaassallugu"*.

Suliassaqqarfiit kiffartuussinissamut isumaqatigiissuteqarfiusut ilanngunnagit, Air Greenland A/S-ip pilersuina suliffeqqarfimmut niuernikkut tunngaveqarluni ingerlanneqarpoq. Air Greenland A/S-ip kiffartuussinissamut isumaqatigiissutaani angallassinermi tulleriiaarnerit allassimapput, tassani ilaasunik angallassineq pingaarnarpaatinneqarluni, allakkanik assartuussineq tuliulluni aammalu nassiussanik assartuussineq pingajuulluni.

**Apeqqut 1a: Nioqqutissanik ulluinnarni pisariaqartinneqartut pillugit sullissineq
pitsanngortinniarlugu Naalakkersuisut qanoq iliuseqalersaarnertik
nassuiassagaat qinnutigineqarpoq.**

Akissut: Royal Arctic Line-p nioqqutissanik ulluinnarni pisariaqartinneqartunik pilersuina ingerlaavartumik pitsanngorsarneqarpoq. Pitsanngorsaanerni pingaartumik umiarsuaatileqatigiiffiup angalanissanut pilersaarutaannik piareersaanikkut ingerlanneqarput. Umiarsuaatileqatigiiffiup pilersaarusiortarnerani aammalu Naalakkersuisut pilersaarutini akuersisarneranni inuiaqatigiinni piffissami atuuttumi pisariaqartitaat naammaginnartumik eqqarsaatigineqartarput.

Air Greenland aamma Naalakkersuisut sumiiffinni kiffartuussinissamut isumaqatigiissuteqarfiusuni ingerlatsineq pillugu ingerlaavartumik attaveqaqatigiipput. Air Greenland A/S-imut kiffartuussinissamut isumaqatigiisummi salliutitassanik

tulleriiaarinernik, matuma siuliani apeqqut 1-imut akissummi taaneqartunik allannguinnissaq pilersaarutigineqanngilaq.

Naalakkersuisut akissummi matumani nassuiaammik tamakkiisumik saqqummiussisinnaanngillat, paasisutissanik akissuteqarnermut atugassanik pissarsiniarnermi piffissangaatsiaq isumalluutillu annertuut atorineqartariaqarmata.

Apeqquut 2: Air Greenlandimut RAL-imullu immikkut suliniuteqartoqarnissaa ajornanngila, taamaalilluni taakku nioqqutissanik ulluinnarni pisariaqartinneqartunik assartuinnerminni annertunerusumik iliuuseqalersinnaaqullugit?

Akissut: Naalakkersuisoqarfimma ilisimatitsissuteqarneri tunngavigalugit sullissisut allakkanik nassiuusanillu apuussisinnaanarlutik sapinngisamik sulisimassasut isumaqarnissamut tunngavissaqarpunga.

Apeqquut 2a: Akissut aappiuppat, ingammik ingerlatsinerup annikiffiani nioqqutissat pisariaqarnerpaat isumannaatsumik isorliunerusunut anngunneqartarnissaat pillugu Naalakkersuisut nassuiaateqaqquneqarput.

Akissut: Royal Arctic Line-p isorliunerusunik pilersuina ukioq kaajallallugu sikunit, aammalu umiarsuit containerit usisinnaasaasa killeqarnerinit, piumaneqartullu allanngorarnerinit akimmisaartinneqartarpoq.

Naalakkersuisut assartuussisunut akuersissutinik tunniussisarput kiffartuussinissamullu isumaqatigiissuteqartarlutik, najukkani niuertut nioqqutissanik, taakkunungalugu aamma ilanngullugit nioqqutissanik pisariaqartinneqartunik tikisitassaminnik assartuussinernik pisisinnaanissaat siunnerfigalugu.

Taamaattumik Royal Arctic Line-p angalanissanut pilersaarutai Naalakkersuisunit akuerineqartussanngoraangata isorliunerusut immikkut eqqarsaatigineqartarput. Royal Arctic Line-p umiarsuaatai piffissani angalaffiunnginnerusuni isorliunerusuni umiarsualivinnut talissinnaatinnagit, Air Greenland akuttunngitsumik timmisartumik qulimiguulimmillu assartuussinikkut pilersuinnermut tapertaasariaqartarpoq.

Apeqquut 3: Nioqqutissat ulluinnarni pisariaqartinneqartut akiisa apparsimaartinnissaannut periarfissat suuppat, tamatumani ingammik KNI Pilersuisumi?

Akissut: Apeqquut Aningaasaqarnermut Akileraartarnermullu Naalakkersuisoqarfimmut saqqummiunneqarpoq, tassanngaanniilli imaattumik ilisimatitsisoqarpoq:

"Naalakkersuisunit KNI A/S-ip nuna tamakkerlugu – aamma sumiiffinni inukinnerpaani – nioqqutissanik ulluinnarni pisariaqartinneqartunik pilersuinerup qulakkeerneqarnissaanut qitiusumik inissisimamata eqqumaffigineqarpoq. Siunertaq inuiaqatigiinnit nammagassaq taanna tapersiiffiginarlugu Namminersorlutik Oqartussat aamma KNI A/S-ip akornanni kiffartuussinissamut isumaqatigiissuteqartoqartarpoq, tassanilu pisiniarfinni, ingerlatseqatigiiffiup nunaqarfinni isorliunerusunilu ingerlataani ilaatigut pisiassat ikinnerpaaffissaannut, ammasarfiinut akigititanullu sinaakkutissat aalajangersarneqartarput.


Isumaqatigiisummi tassani akit, nunami sumiikkaluaraanniluunniit atugassarititaasut naammaginatut atorlugit innuttaasut nioqqutissanik nalinginnaasunik pissarsisinnaanissaannut qulakkeeriffiusut atorneqarnissaat qulakkeerneqarpoq.

Tamatuma peqatigisaanik Naalakkersuisut naliliipput, nioqqutissanik pilersuineq siunissami qanoq iliorluni aningaasaqarnikkut nammaneqarsinnaasumik aaqqissuunneqarsinnaanersoq pillugu KNI-p oqaloqatigineqarnissaata ingerlaannarnissaa pisariaqartoq. Illoqarfinnut eqiterunneq inuiaqatigiillu katitigaanerisa allanngornera isorliunerusuni pisiniarfinnik ingerlatsinerup aaqqissuussaanaannut nutaanik piumasagaateqarfiuvoq. Ilaatigut siunissaq ungasinnerusooq eqqarsaatigalugu – aningaasaqarneq inuiaqatigiillu eqqarsaatigalugit – pilersueriaatsinik qanoq iliorluni naleqqussaasoqarsinnaanersoq, taamaalillunilu siunertaasumik naammassinnissinnaaneq ingerlaannarsinnaanersoq apeqquserneqarpoq. Oqaloqatigiinnermi tassani ilaatigut kiffartuusseriaatsit, ingerlatseqatigiiffiup illuutaanik nutarterinissamut periarfissat, kiisalu ingerlasussanik piareersaannerit aaqqissuussinerillu aammalu pisiassat naleqqussarneqarnissaat sukumiinerusumik oqaluuserineqarpata iluaqutaasinnaavoq.

Innuttaasut aamma siunissami nioqqutissanik ulluinnarni pisariaqartinneqartunik akit akilernerqarsinnaasut atorlugit pisiniarsinnaanerini, tamatumalu peqatigisaanik ingerlatseqatigiiffiit aningaasaqarnikkut tunngaviinik nukittorsaanissamik, aammalu inuiaqatigiinni suliassat akisussaassusilimmik ingerlatiinnarneqarsinnaaneriniq qulakkeerinissaq siunertarineqarpoq.”

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Aqquuaq B. Egede